

# Regenza ha già ademplì l'incumbensa Tenchio

Incumbensa da deputà Luca Tenchio (pcd Cuira) concernent la finanziaziun da classas bilinguas

DA MARTIN CABALZAR

■ **La regenza grischuna ha già ademplì e mess en vigor l'incumbensa da deputà Luca Tenchio (pcd Cuira) concernent la contribuziun chantunala a tut las vischnancas che mainan classas bilinguas en las linguas chantunales. Per quest intent ha la regenza midà l'ordinaziun guvernamentala davart la promozion da las linguas.** En la sessiun d'october 2013 è deputà *Luca Tenchio* (pcd Cuira) s'engaschà sin plaun chantunal per las scolas bilinguas a Cuira. Uschia ha el cuntanschì che tut las vischnancas grischunas vegnian tractadas a moda eguala quai che concerna las classas bilinguas.

## Ordinaziun vertenta

L'ordinaziun da linguas dal Grischun (art. 1 al. 1) preveda ch'il chantun po conceder contribuziuns chantunales a la realisaziun ed al manaschi da classas bilinguas en vischnancas monolinguas e plurilinguas. Uschia paja il chantun actualmain contribuziuns pauschalas da maximalmain 500 francs per scolar per installar scolas u classas bilinguas en vischnancas «tudestgas» e maximalmain 400 francs per scolar als custs da manaschi per talas scolas en vischnancas «monolinguas e plurilinguas».

## Eliminar il tractament inegal

Tenor la missiva tar la lescha da linguas tutga la citad da Cuira u tar las vischnancas «monolinguas» u tar las vischnancas «plurilinguas», mabain tar las vischnancas «tudestgas». Uschia pajava il chantun fin qua bain contribuziuns pauschalas per installar classas bilinguas, dentant naginas contribuziuns da gestiun a la citad da Cuira. Perencunter datti contribuziuns da manaschi per vischnancas sco



**Deputà Luca Tenchio è s'engaschà sin plaun chantunal per la scolas bilinguas tudestg/rumantsch e tudestg/talian a Cuira.** FOTO Y. BÜRKLI

Domat, Bever, Beiva, Schlarigna, La Punt-Chamues-ch, Puntraschigna, Trin, Glion, Samedan e Malögia che mainan medamamain classas bilinguas.

Per Luca Tenchio è quest tractament inegal da la classas resp. scolas bilinguas ina spina en ils egl. Ensem cun 60 consignants ha el incumbensà la regenza d'eliminar questa inegalitad. Tenor sia argumentaziun vegn la finamira da mantegnair e promover la lingua taliana e rumantscha fixada en la lescha da linguas cuntanschida en vischnancas tudestgas gist uschè bain sco en vischnancas rumantschas u tudestgas. L'ordinaziun vertenta relaschada da la regenza cuntrafetschia uschia a l'intent da la promozion, independentmain sche la vischnanca vegn considerata sco vischnanca mo-

nolingua, plurilingua u tudestga. Tenor las directives da l'uffizi per la scola populara ed il sport è «la finamira primara da scolas u singulas classas bilinguas (en il senn d'ina immersiun parziala) la promozion da las linguas chantunales talian e rumantsch». Ultra da quai vegnia prendi en mira ina cumpetenzza pli auta en il diever da la segunda lingua.

Per eliminar quest tractament inegal ha deputà Luca Tenchio, sustegnì da 60 collegas, inoltrà a la regenza la proposta da midar l'art. 16 al. 1 da l'ordinaziun da linguas. Tenor questa proposta duain betg mo vischnancas monolinguas e plurilinguas avair il dretg da contribuziuns da gestiun, mabain tut las vischnancas che mainan classas u scolas bilinguas en duas linguas chantunales.

## La regenza è d'accord

En sia resposta constatescha la regenza che la lescha chantunala da linguas haja tranter auter l'intent da mantegnair e promover la lingua rumantscha e taliana. «Ina mesira da promozion efficazia persiva è la scola bilingua», scriva la regenza. Actualmain porschian var 10 vischnancas grischunas scolas e classas bilinguas, tranter auter la citad da Cuira.

Perquai che la scola bilingua servia dentant en tut las vischnancas al medem intent da promozion ha la regenza concludì ina midada correspundenta da l'artitgel 16 al. 1 da l'ordinaziun da linguas, uschia ch'il chantun possa pajar a tut las vischnancas contribuziuns er als custs per manar classas e scolas bilinguas.

La regenza è consequentmain pronta d'acceptar ed en il medem temp era da considerar l'incumbensa Tenchio sco liquidada.

## Finanzas da Cuira vegnan distgargiadas

En ina communicaziun da pressa constatescha la pcd da la citad da Cuira cun satisfaziun che la contribuziun chantunala distgargia las expensas da la citad da Cuira per manar scolettas e classas bilinguas. Questa mesira da promozion saja bainvegna e possa vegnir qualificada sco ulteriur pass enavant per mantegnair las scolettas e las classas bilinguas a Cuira. La pcd n'haja betg mo cumbattì la scassada da la scola bilingua a Cuira, anzi ella sa stentia er activamain per tscherugar soluziuns raschunaivlas, scriva la pcd da la citad da Cuira.

## Classas biliguas – in success

La citad da Cuira maina dapi l'onn da scola 2000/2001 classas bilinguas. Oriundamain existiva questa purschida mo sin il stgalim primar, pli tard è vegnì vitiers ina purschida supplementara per il stgalim superiur e dapi l'onn da scola 2011/2012 maina la citad da Cuira er scolinas bilinguas. Actualmain visitan 63 uffants las classas tudestg/rumantschas e 199 las classas tudestg/talianas dal stgalim primar, 19 uffants la scolina tudestg/rumantscha e 20 uffants la scolina tudestg/taliana. Il project che è vegnì accumpagnà scientificamain da l'Universitad da Friburg ha attratg l'attenziun da l'entira Svizra. Il project è d'impurtanza linguistic-regiunala e d'alta qualitad ed in'impurtanta contribuziun a la sensibilisaziun per las linguas e da lur mantegniment, constatescha Luca Tenchio.